



天津交通銀行同
人俱樂部圖書室

左文襄公奏稿卷二十一

起同治六年卯正月訖四月

目錄

敬陳籌辦情形摺

懇開劉典甘肅按察使缺 賞給京銜幫辦陝甘軍務片

調廣東陸路提督高連陞隨同征剿片

懇 恩敕下楊岳斌劉蓉悉力支持片

請派道員總辦陝甘後路糧臺片

甘省糧餉兩絀謹擬籌辦情形摺

籌擬購練馬隊摺

採買戰馬請免稅片

奏稿卷二十一目錄

請 敕喜昌假滿赴營分統馬隊片

漢陽府知府鍾謙鈞請助餉隨征片

由鄂啟行摺

請散捻逆脅從片

懇 敕察閩中蜚語片


喜昌請假回旂咨送引 見片

陳明行期未能迅速摺

遵 旨寬籌餉項以支危局摺

江海關協甘月餉請照原撥續撥銀數按月全解片

隨州追賊出境剋期入關摺



洋商借款請 敕各省督撫速發印票片
晉防緊要請調吉林礮手由綏遠城入晉助勦片
鮑超傷病情形片

奏稿卷二十一目錄

同治六年正月初一日內閣奉

上諭陝甘總督一等恪靖伯左宗棠著督辦陝甘軍務欽此
軍機大臣字寄同治六年正月初一日奉

上諭趙長齡奏晉省防務喫緊咨調豫軍渡河協守并林壽圖奏
請敕左宗棠先清秦境疏通糧路各摺戶捻匪竄過渭北擾及三
原高陵勢將東逼同朝該處與晉省僅隔一河防務異常緊急趙
長齡見在分布水陸諸軍於蒲州等處要隘駐紮即著督飭陳湜
嚴密扼守并著曾國藩李鴻章李鶴年懍遵前旨分飭劉松山保
英兩軍兼程馳赴同朝與陳湜所部晉軍聯絡聲勢互相援應毋
任捻蹤東渡黃河鮑超一軍兼程入秦痛剿逆氛援救省會不可

奏稿卷二十一

一

再稍遷延亦不可以驅賊入晉爲卸責奮勉圖功毋干重罪并著
李鶴年運籌糧米接濟援陝諸軍毋得稍分畛域左宗棠前已有
旨令其迅速赴陝復明降諭旨令督辦陝甘軍務此時陝省情形
更爲喫緊軍政廢弛已極著卽星夜馳赴嚴申紀律將玩法將領
從重懲辦以冀肅清陝境乘勝入甘左宗棠未到以前陝省防剿
事宜仍著喬松年勉力督辦將此由六百里諭知曾國藩左宗棠
李鴻章李鶴年趙長齡喬松年并傳諭鮑超知之欽此

軍機大臣字寄同治六年正月初九日奉

上諭前因陝西軍務緊急各軍潰散降旨將劉蓉罷斥令左宗棠督辦陝甘軍務并令庫克吉泰德興阿先赴陝省剿賊再行入甘又疊諭鮑超帶兵入陝諒已遵旨分道赴援茲據陝西紳士車順軌等奏上年十二月賊撲省城官軍三十餘營行至灞橋被賊圍裏傷亡大半省外四五里內俱係賊營官軍降賊者亦復不少加以西路回匪竄越汧隴萬一句結勢更滋蔓省城糧斷援絕若不飛調勁旅救援斷難保守請飛敕鮑超迅速赴援等語刻下陝西各軍新潰招集未齊捻蹤分股竄擾無兵扼截蹂躪自不待言專盼各軍入關方能重振軍威力圖埽盪著曾國藩李鴻章迅即催

奏稿卷二十一

二

令鮑超劉松山等軍兼程入陝相機進剿仍兼顧山西河防慎勿驅賊入晉左宗棠已到何處未據奏報著卽星速入關統率各軍與喬松年力加整頓無庸俟劉典募勇致稽時日左宗棠未到以前喬松年責無旁貸著卽招撫各軍保全完善慎衛省城鮑超一軍前諭徑行入關無庸回鄂該提督務當懍遵疊次諭旨赴援陝省不得再有觀望致千重究庫克吉泰德興阿由山西赴陝道途非遠卽著迅速拔營先剿陝西賊匪俟左宗棠到後各兵齊集再行斟酌進止赴援慶陽陝西各軍糧餉著左宗棠督飭王加敏妥籌報解以贍飢軍而維大局車順軌等原摺一件均著鈔給閱看將此由六百里諭知曾國藩左宗棠李鴻章庫克吉泰德興阿喬

松年并傳諭鮑超知之欽此

奏稿卷二十一

三

附國子監祭酒車順軌等摺

同治六年正月

奏為瀝陳陝西省城危急情形懇

恩迅調勁旅以救生靈而維大局恭摺具奏仰祈

聖鑒事竊臣等籍隸陝西前因捻匪闖入關中盤踞二華恭

閱邸鈔已蒙

簡拔陝甘總督左宗棠督辦陝甘軍務仰見

聖慮周詳軫念西陲至意臣等聞

命之下莫不欽佩乃於本年正月初旬臣等接到陝西在籍

紳士二品頂帶前廣東候補道李宗沅等函稱捻匪竄擾陝

西賊目卽張總愚并聞宋景詩亦在其內能戰悍賊約有數

奏稿卷二十一

千騎多步少沿途裹脅不下數萬初則盤踞二華上年十一

月初八九等日突入近郊直逼省垣嗣又東擾藍田圍困多

日於二十六日又復北擾臨潼縣之新豐陰槃等處與官軍

相持方冀賊由商雒竄出陝疆柰連日大雪山路不開賊復

由厚子鎮回竄臨渭官軍尾賊而行至新豐一帶各營皆為

賊所遮絕營盤被困十二月十七八日賊徑撲省城官軍三

十餘營行至灞橋賊突以馬隊層層包裹湘果一營全行覆

沒總兵蕭德揚陣亡各營官傷亡大半見將省城圍圍圍定

如東門外之火神廟西門外之火神廟南門外之小雁塔北

門外之紅廟坡離城四五里內俱係賊營四面環攻文報不

通糧路斷絕省城危如累卵且官軍降賊者亦復不少裹脅
丁壯劫奪馬匹婦孺狂奔哭聲載道其顛連之狀慘不忍言
加以西路回匪竄越汧隴萬一勾結勢更滋蔓所望鮑提督
一軍西來救援柰因湖北之事又復反旆士民聞之莫不寒
心若救援稍遲關輔情形已不堪問矣各等語伏思關中爲
形勝之區自回逆倡亂以來百姓蹂躪已不堪言去歲捻匪
入關軍民多惑於賊不殺人不踞城之說以致華陰華州渭
南臨潼藍田咸甯長安盩厔鄠縣附省各縣俱經賊匪擄掠
一空官軍屢次失利見在省城被圍甚急糧斷援絕若不飛
調勁旅立即救援斷難保守兼之城內回民時形蠢動設有

奏稿卷二十一

五

不測深爲可慮左宗棠到尙需時日合無仰懇

天恩卽飭提督鮑超無分星夜迅速赴援以救生靈而保關
輔臣等爲西陲大局起見不揣冒昧據實瀝陳謹合詞恭摺
具奏伏乞

皇太后

皇上聖鑒

軍機大臣字寄同治六年正月十四日奉

上諭劉蓉奏覆陳賊勢趨重地方見在籌辦情形請敕左宗棠星馳赴陝以一事權并陳與喬松年共事棘手鈔錄往復信函呈覽各摺片張總愚股匪見踞鄠縣之秦渡鎮花園鋪爲老巢其游騎或鳧渡渭水擾及興平武功醴泉等處爲數無多劉蓉見將潰散各營整理就緒劉松山一軍亦於去臘抵省覽所奏籌策情形欲令劉松山由義井寨徑擣老巢則各游氛不攻自息所籌未嘗不是而喬松年又欲令該軍先向西行自北而南又稱不必指定所向於剿賊情形辦理殊無把握賊之慣技每多方以誤我師該逆大股皆在渭南若以游氛數十騎渡渭之故遽令勁軍株守渭北

奏稿卷二十一

六

不行進剿則陝省之賊何日可平耶劉蓉固係獲咎之員然使所言尙合機宜亦當不以人廢言喬松年何得固執已見專事齟齬使諸將觀聽惶惑迷於所向左宗棠見在行抵何處何以日久絕無奏報殊不可解陝省軍事孔急若再貽誤闔繫匪輕著卽星馳入陝迅籌調度以一事權并著喬松年振刷精神廣咨方略迅督劉松山等軍進擣該逆鄠縣老巢痛加剿洗不可爲賊牽制坐失事機如始終膠執貽誤疆事必治該撫以應得之罪懷之劉蓉原摺片著發交喬松年并鈔給左宗棠閱看將此由六百里各諭令知之欽此

附前署陝西巡撫劉蓉摺片

同治六年正月

奏爲遵

旨覆陳賊勢趨重地方及見在整頓籌辦情形恭摺具奏仰
祈

聖鑒事竊臣於五年十二月二十五日曾將官軍追賊挫衄
各情形縷晰馳奏在案本月初三日欽奉十二月二十七日
諭旨張總愚賊股業已渡渭劉蓉因循坐誤等因欽此查張
逆前由藍田竄入新豐意圖就該處沙灘搶渡渭北經官軍
奮力擊剿敗趨西南往鄂盩一路疊據該二縣稟報逆匪前
隊竄擾啞柏槐芽各鎮而張總愚老巢仍踞鄂縣之秦渡鎮

奏稿卷二十一

七

花園鋪一帶距省城約五十里其游騎或鳧渡渭水擾及興
平武功醴泉等處然爲數均屬無多我軍自去臘十八日追
剿失利後經臣飭令諸將收集潰散逐加整頓均已次第就
緒惟各軍月餉懸欠在一年以外而司庫支絀萬分僅於除
夕籌給十日之餉各營器械旂幟半多遺失不得不添製補
發亦往往苦於無費臣既交卸篆務已無籌餉之權欲圖激
勵軍心徒作仰屋之嘆旦夕焦慮無計可施幸各將卒諒臣

苦衷共篤義憤但能稍資點綴即可直振軍威又值兩江督
臣曾國藩所派皖南鎮劉松山一軍已於去臘二十九日到
省該鎮所部皆湘人軍容甚整士氣益強臣比與悉心面商

此時該游騎四出然我軍但能徑擣老巢賊必收集一處各路游氣不攻自息因屬令先率所部駐紮距省三十里之義井寨堅壁勿戰俟初旬外陝軍整頓旂幟卽會同進攻花園鋪秦渡鎮老巢相與併力大戰幸而克捷卽視賊所向分追躡截以策全功劉松山深以爲然當於初三日率師開赴義井寨臣一面函達喬松年告以情形旋接該撫臣覆函謂不必指定所向又檄劉厚基等拔赴興平咸陽防堵諸將領無所適從復來臣寓請示臣以該撫臣既有檄飭未便改調祇得函止劉松山暫緩前進又接鮑超來咨定於十二月二十一日自鍾祥開拔由荆紫關入秦將來統帥更多意見難合

奏稿卷二十一

八

則諸將觀聽惶惑於大局益滋貽誤相應請

旨敕下督

臣

左宗棠星馳來陝督辦以一事權

臣

雖疾病侵

尋亦不敢置身度外期仍以閒散人員聯絡軍心規畫形勢或能勉竭駑鈍終效涓埃所有見在籌辦緣由理合附驛馳陳伏乞

皇太后

皇上聖鑒訓示

再查張總愚見率巨股踞秦渡鎮花園鋪一帶爲老巢而游騎四出或渡渭河擾及興平武功扶風乾州醴泉等縣揆其狡謀一則多方誤我牽制兵勢一則以我軍新挫圖乘間肆

其擄掠然據興武各等縣稟報亦不過數十騎百餘騎非有大股巨賊也故臣與劉松山熟商此時兵力宜合併一處先擣該逆老巢則游氛自息俟其敗竄再行相機截剿不宜分兵四出徒墮賊計比接喬松年來函謂劉松山一軍宜先向西行然後自北而南庶可遏賊渡渭之謀臣不解所謂先向西行者係趨何地然後北趨何地南趨何地何以遂能遏賊渡渭因函覆喬松年請其詳細指示免諸軍迷於所向旋接覆函渾淪其詞謂不必按圖指授或有未宜轉使得以藉口等語并謂臣欲擊賊使之北竄該撫臣則恐其北竄而預堵之查此時官軍與賊所踞之地皆在渭河以南若使各軍西

奏稿卷二十一

九

趨興武卽當引軍由咸陽渡渭河北岸上駛及其折而南趨又當轉回咸陽渡渭河南岸乃可與賊相遇是所謂向西行再折而南者不過引軍赴北岸巡哨一次耳當我軍西趨之際游氛之在北岸者或遂折回老巢然及其折而南趨則該逆又將引而北渡誰能禁之而該撫臣謂先向西趨再折而南卽可遏賊北竄此則愚臣之所不解者至謂臣欲擊使北竄則臣初無此說查該逆初趨華陰嗣竄臨潼見踞秦渡皆沿渭水南岸其蓄謀搶渡北岸蹂躪西同各屬完善雖童穉猶能知之獨恃渭水一帶限隔渭水見雖淺涸然向係濁流泥滓特深賊或鳧渡要不過數十百騎至張總愚大隊挈眷

屬挾輜重非搭造浮橋決不能過故此時逆蹤所占地段究不能多此

臣愚見所以欲由義井寨徑擣其巢冀得痛加剿洗則各處游氛自息截擊不難既以此說函覆喬松年而該

撫臣覆書不置一詞但謂劉松山一軍應聽其自行酌度伏

思疆臣辦理軍務卽不能詳審賊勢密投機宜亦當明示趨

赴何地擊剿使將卒有所遵循安有但指東南西北之虛位

聽其自爲趨舍者況劉松山一軍千里遠來於地方形勢全

不熟悉尤應指示趨向乃喬松年一則謂不必按圖指投轉

令有所藉口一則謂自行酌度是其居心狡猾故作游移以

爲勝則可以居功敗卽可以諉過該撫臣所以爲自全之計

奏稿卷二十一

者則誠巧且工矣曾亦思

朝廷所以委任疆臣畀以軍事者何等重大獨安忍坐觀成

敗而不之顧乎臣以病休閒散一員祇因軍事羈畱疊奉

諭旨命與喬松年悉心籌商辦理不敢稍涉諉卸然每與該

撫臣商酌機宜輒依違不置可否事後卽竊竊私議巧肆擠

排見值鄰省援軍漸集而喬松年始終惟用此術詭滑推延

巧爲藏身之固事勢已棘不獨各軍將領茫然無所適從卽

臣亦覺萬分棘手五中焦灼不得不將近日規畫情形據實
陳明并鈔錄往復信函恭呈

御覽伏祈

聖鑒訓示敕遵

奏稿卷二十一

十一

聖鑒訓示敕遵

軍機大臣字寄同治六年正月十五日奉

上諭前因已革陝西巡撫劉蓉操守尙好曲子優容乃於捻回偏近先請開缺追賊竄陝西疊經諭令仍統軍務出省督剿又復遷延觀望致令軍無統帥遇賊頻挫且於喬松年甫經到省卽與齟齬肆行糾劾以致互懷猜忌喪師奔潰大失機宜前年已明降諭旨將劉蓉革職敕令回籍乃本日奏陳劉松山援陝擊賊獲勝情形一摺并未與喬松年會銜所稱劉松山之援陝係聞陝軍潰敗爲該革員報仇雪恥而來又復意存攘功其實始終并未出省且昨奏渭北并無大股賊匪喬松年牽制湘淮各軍不令前赴渭南今日所奏勝仗如在渭南則喬松年并未牽制各軍如在渭北則

奏稿卷二十一

三

與昨奏又不相符該革撫前次疊被參劾朝廷舍短取長并未苛求今居心如此難逃洞鑒著左宗棠於到陝後將劉蓉何日奉到革職回籍諭旨并本日奏到摺件是否在奉到革職回籍諭旨之後查明具奏此次所稱接仗各地名係渭南渭北及劉蓉另片所陳喬松年傳見都司李良田以示親厚等語并陳該撫不諳兵事各節均著左宗棠詳查具奏劉蓉摺片均著鈔給閱看喬松年甫到陝境難保不巧懷趨避而劉蓉局量褊狹所奏亦未必俱係實情該總督當以國事爲重秉公查覈查明是非不可稍涉偏袒見在陝事孔急左宗棠毋論行抵何處卽著星夜馳赴關中以顧大局將此由五百里諭令知之欽此

附前署陝西巡撫劉蓉摺片

同治六年正月

奏爲援師勦賊力戰大挫兇鋒見催各軍繼進恭摺馳陳仰祈

聖鑒事竊

臣

於正月初七日曾將皖南鎮劉松山老湘營各

軍開赴義井寨旋令就近暫紮情形馳奏在案初八日接據

劉松山等牘稱初三日進紮距省十五里之魚化鎮初四五

等日疊有馬賊數百來撲均經擊退稍有斬獲張逆大股屯

踞秦渡鎮花園鋪梁家橋一帶據生擒賊供該逆計圖大舉

來犯決一死戰等語當飭各營嚴備以待初六日早探報大

隊賊股湧來劉松山等立即派定隊伍相機迎戰辰初賊數

奏稿卷二十一

三

百飛馳而來將近營盤因飭各營畱四成隊固守營壘派七
成隊出營里許排列陣勢以老湘一四五六等旂列前二三
旂及和字營列左八十兩旂列右七九副前等旂居中以備
衝鋒厚字營及敬字營列後壽字營馬隊張兩翼排列彼此
商定無論前左右三面有大股來敵後路隊伍總宜穩持不
動正布定間馬賊數千四遠包圍而步賊萬餘結成十餘隊
蜂擁撲近矛杆林立槍礮亦多劉松山等立飭一四五六等
旂奮力迎敵煙塵蔽野鏖戰逾時賊勢稍卻旋復加派馬步
大隊分三面冒煙猛撲勢極兇悍劉松山等指揮中左右三
面各營槍礮連環刀矛奮進該逆仍復冒死不退劉松山隨

又分飭七九副前等旂從大陣中分三面衝出十盪十決賊漸退開是時騎賊向遠包抄已出我軍之後編修張錫鏞自率淮勇百餘人奮力衝擊陷入賊陣身帶十餘傷登時殞命該逆乘勢復分馬賊衝撲營盤幸各營早已預備均經擊退其大股悍黨仍拌命猛撲我陣各勇壯氣百倍猛力抵敵該逆旋敗旋撲者七八次各勇奮猛倍常再接再厲戰約數時之久賊屍枕藉逆勢不支漸引而退該總兵等見賊氣將衰於是號鼓雷鳴呼聲震地各率隊伍衝擊賊遂大敗追奔八九里斬馘甚夥該逆悉遁還秦渡鎮一帶戍刻收隊歸營是役自辰至戌惡戰終日共計斃賊一千三四百名帶傷逃去

奏稿卷二十一

古

者不計其數生擒百餘立就陣前正法奪獲騾馬七十餘匹旂幟一百三十面擡槍七件小槍一件其餘刀矛軍械甚夥查點老湘營勇丁陣亡十八名受傷九十六名敬字三營陣亡十九名受傷三十六名和厚兩營傷亡十三名受傷三十二名厚字營營官陳福萬受傷較重容俟查明繕摺彙報等情前來伏查劉松山等率師遠來喘息未定卽能激勵士卒惡戰終日痛挫兇鋒洵屬丕振軍威見探張逆敗後卽將咸陽興平武功醴泉扶風各處游騎收集回巢憤圖大舉報復牛東一帶賊騎充斥劉松山函催撥營助戰以期痛加剿洗

臣查渭河北岸游氛旣經該逆調回老巢則喬松年所欲派

赴西路之師更可無庸前往見擬派撥劉厚基鄢太愚黃鼎等各率所部併力前進以壯聲威而摧兇焰至翰林院編修張錫鏞千里赴援壯志未展遽卽奮勇捐軀深堪憫惻劉松山稱其自到軍營常著草履與士卒同甘苦文學之臣能堅苦自奮如此臣實惜之相應叩懇

天恩交部優加議卹以慰忠魂所有援師勦賊力戰大挫兇鋒見擬派親兵繼進緣由理合恭摺由驛馳陳伏乞

皇太后

皇上聖鑒訓示再此次摺件仍係借上次備用巡撫關防印花繕發合併聲明

奏稿卷二十一

五

再楚軍自去臘十八日挫衄之後月餉欠懸飢寒交迫死者無葬埋之費傷者無醫藥之資各軍將領日來臣寓泣訴臣

既屢次函告喬松年求爲飭局給發銀兩并不見覆二十八

日臣親赴撫署告以情形該撫臣言此事當問藩司囑臣自

與林壽圖商酌林壽圖以未奉札飭亦難專擅至除夕始發十日之餉然旂幟號衣器械之類迄今尙未製辦給發何論

餉精見值張逆被老湘軍擊敗之後忿圖大舉劉松山自慮

兵力尙薄眾寡難敵函囑臣催速各軍踵進以期併力痛勦

臣比傳劉厚基鄢太愚黃鼎等飭令迅速整備前征乃據劉

厚基面稱喬松年正在催赴咸陽興平一帶該員等稟請速

發器械旂幟備用而該撫臣諭令不許更待辦齊卽速遣征
否則必加參辦劉厚基等無可如何又來臣處分詎查張逆
巨巢旣踞秦渡其各路游氛又均收回南岸自應就近痛擊
不當置兵於北岸無賊之地而軍械不全旂幟不整是以其
卒予敵安望克敵制勝之功喬松年於兵事太不諳悉於賊
勢軍情太無體察隨意指揮視同兒戲臣實憂之前經奏乞
天恩迅敕左宗棠來陝督辦軍務不知能否仰邀

俞允然計左宗棠卽能速來逮到陝已在二月中旬見在軍
情緊急茫無主持實堪焦灼萬一事機再誤劉松山一軍復
爲逆眾所乘則陝局不堪設想不得不據實陳明伏祈

奏稿卷二十一

去

聖鑒訓示

再查劉松山所統步隊約十七營馬隊三起其本部名老湘
營者十二營又壽春鎮李祥和帶和厚兩營皆屬湘軍編修
張錫鏢所帶敬字三營係屬淮軍均於去臘二十三四日行
抵潼關二十九日劉松山率師到省來見備述所部湘軍子
弟聞臣軍失利之信均皆奮躍而來思爲臣報雪仇恥已於
二十五日在潼關先行度臘二十六日卽拔隊兼程來省見
擬卽日開赴前敵等語臣以該軍遠來疲乏囑令休息兩三
日再行前進乃喬松年以其爲湘軍而惡之每加褻貶謂湘
軍不如淮軍先存隔膜之見查張錫鏢前由雲南學政丁艱

過蜀臣時在四川藩司任內見其爲人樸質耐苦志操過人
兩薦兩江督臣曾國藩處學習營務曾國藩旋令募淮勇三
營訓練成軍與劉松山同紮一處此次到陝劉松山每贊該
編修訓練之勤張錫鏞亦甚贊劉松山治軍之整是該二員
初無不洽之處臣以張錫鏞所募淮軍未經戰陣每囑劉松
山力爲護持并誠張錫鏞依附湘軍勿恃銳輕進該二員亦
皆深以爲然乃喬松年疊次傳見淮營都司李良田以示親
厚李良田旋向外間聲言我軍主將係翰林曾任學政豈可
由劉鎮節制況捻逆但畏淮軍不畏湘軍等語初五日張錫
鏞來至臣寓當卽告以此語囑令傳諭營弁併力同心勿懷

奏稿卷二十一

七

湘淮軍之見不期該編修卽於初六日奮勇捐軀實堪愴惻
見在淮軍三營無員統帶不得不令歸併老湘營由劉松山
拊循調度甚慮旁人挑剔彼此或生歧異卽難冀其得力擬
以後察看情形如不相安卽函告曾國藩將此軍調回徐州
或另派委員接管理合附片陳明伏乞

聖鑒

敬陳籌辦情形摺 同治六年正月初十日

奏為疊奉

諭旨敬陳籌辦情形仰祈

聖鑒事竊 臣於上年十二月十六日在江西九江府奉到

寄諭著即馳赴甘肅督辦軍務暫時毋庸來京俟甘省軍務事竣再行奏請欽此二十三日行抵湖北黃州復奉

寄諭見在陝西賊匪已竄南山希圖直達漢濱該處棚民簽匪本屬不少設令句結引導西徂川疆東擾楚境皆意中事而商洛之長嶺關竹林關漫川關等處緊與鄖西接壤其勢尤易波及左宗棠帶兵由湖北入秦著即確切偵探覘賊所向迎頭扼堵杜賊竄

奏稿卷二十一

鄂之路如賊尚在秦即著該督迅赴陝西督飭諸軍先剿南山一帶之賊俟此股辦有眉目再赴甘肅督剿回逆劉典一軍曾否啟行并著催令赴營以資得力欽此二十六日武昌行次復欽奉寄諭劉典奏因病不能即日起程并募勇尙需時日請賞假五箇月等語甘肅情形待援孔急前因陝西賊勢鴟張督率無人令左宗棠由鄂入秦先行督剿陝西賊股惟左宗棠兵數不多必須劉典趕緊料理到營兵力始能稍厚若遷延數月則軍情賊勢變幻靡常局勢何堪設想劉典著賞假兩箇月一面趕緊調理一面募勇訓練剋期啟行左宗棠懷遵本月十六日寄諭帶兵迅即入陝杜賊入鄂督同該撫等肅清陝境欽此竊維 臣由閩啟行時念舊

部分駐兩省得力將領除蒙

恩簡放實缺外均已奏委署理要缺鎮將若檄調隨征則閩浙頓覺空虛殊爲可慮雖各員告請西征概未敢許其所攜以同行者僅三千餘人奏請劉典幫辦軍務亦僅令選募舊部三千人初意南人用之西北本非所宜祇可多挑營官哨長之才入秦後再將陝甘見存各營兵勇分別汰留而勻撥膽技稍優弁勇充當親兵護哨編列成營以倡勇敢之氣庶臣部行糧可資節省而陝甘飢軍亦可漸有位置兩得之道也又臣軍頻年轉戰東南山澤之鄉無須多用馬隊每次上口採買爲數本屬無多當由閩拔隊之時以嶺嶠艱阻水陸數易所有戰馬驅以隨行必形疲乏故遂畱之

奏稿卷二十一

九

閩中原擬抵鄂後派弁上口採購至鞍鞞一切又須在陝西製買故前此預先陳明抵鄂抵西安後均不能無少耽延也昨抵黃州接見守令始知捻逆大入鄂疆漢黃德一帶均形震動復奉

寄諭竄陝捻逆又已擾及南山傳聞賊蹤蔓延甚廣萬騎縱橫鄂陝官軍均不得手臣於二十六日相度營地暫於漢口鎮北橋口地方安紮六營二十八日入駐新營一面飛催劉典迅速選募成軍來鄂會隊并增調各營於原擬六千人外再加募六千合成一萬二千人均限一月到鄂惟馬匹無從購覓託官文代爲搜索亦僅得馬二百八十餘匹而已

諭旨敕臣由鄂入秦先剿陝逆此時臣軍步隊僅止三千餘馬隊

尙未習練雙輪獨輪車式尙未動工製造所擬以制賊者步隊馬隊車營而皆無以應手倉卒就戎必貽後悔臣不敢不慎也方今所患者捻匪回逆耳以地形論中原爲重關隴爲輕以平賊論剿捻宜急剿回宜緩以用兵次第論欲靖西陲必先清腹地然後客軍無後顧之憂餉道免中梗之患謹卽一面就地採買口馬練習馬隊先造獨輪礮車暫應急需俟所調各營取齊由襄樊出荆紫關徑商州以赴陝西卽古由武關入秦之道沿途遇賊卽擊比抵陝西則製造雙輪礮車兼雇買車輪俟採買口馬到陝增練馬隊并習車營一面開設屯田總局相度秦隴緊接要隘有水草可田可牧者開設屯田一面汰遣陝甘各營去疲冗省軍食爲久遠之

奏稿卷二十一

三

規其願畱屯田者編入冊籍指地屯牧不願畱者資遣散回各本籍禁其逗畱爲患然後軍制明而內訌可以免屯事起而軍食可漸裕也甘省回多於漢蘭州雖是省會形勢孑然孤立非駐重兵不能守駐重兵則由東分剿各路之兵又以分見單不克挾全力與俱一氣埽盪將來臣軍入甘應先分兩大枝由東路廓清各路分別剿撫俟大局戡定然後入駐省城方合機局是故進兵陝西必先清關外之賊進兵甘肅必先清陝西之賊駐兵蘭州必先清各路之賊然後餉道常通師行無梗得以壹意進剿可免牽掣之虞亦猶之江皖布置周妥然後入浙浙江肅清然後入閩閩疆肅清然後入粵已復之地不令再被賊擾當進戰時卽預收善後之

效民志克定兵力常盈事前計之雖似遲延事後觀之翻爲安速自古邊塞戰事屯田最要臣已屢陳其利矣漢宣帝時先零羌反趙充國銳以自任其所上屯田三疏皆主持久之義宣帝屢詔諄責充國持議如初卒收底定成效可知兵事利鈍受其事者固當身任其責至於進止久速則非熟審彼己長短之形飢飽勞逸之勢隨機立斷不能此益未可以臆度而遙決者也臣頻年轉戰東南於西北兵事未曾經歷所部均南方健卒於擒回伎倆并無聞見若不慎之幾先加以迫促誠恐所事無成時局亦難設想明臣孫傳庭催促出關卒以致敗可爲前鑒也伏懇

皇上假臣便宜寬其歲月責臣以西陲討賊之效不效則治臣之

奏稿卷二十一

三

罪以明軍令臣惟勉竭駑鈍次第規畫以要其成勦擒回均惟事機所在若兵力未集馬隊未練屯務未舉車營未成則無所藉手以報

君父臣雖身任咎責無補時艱此則耿耿愚忱有不能不預爲披瀝者謹恭摺具陳借用湖廣總督預印馳遞伏乞

皇太后

皇上聖鑒訓示謹 奏

軍機大臣奉

旨另有旨欽此

懇開劉典甘肅按察使缺

賞給京銜幫辦陝甘軍務片

同治六年正月

初十日

再新授甘肅按察使劉典奉

命幫辦陝甘軍務因母年篤老衰病侵尋頻年效力行間積勞成疾請

賞假五箇月旋奉

諭旨准假兩月劉典感荷

恩施念西事孔急不遑啟處擬卽糾集舊部遴員管帶前來一俟親病稍痊卽當繼進而來函頗以前在浙臬任內父喪未克奔赴憾抱終天此次絕裾而行言念老母臥病在牀實有旦夕不忍言

奏稿卷二十一

三

之隱恐一經履任爲職守所羈有時欲歸未能泣悔何及情詞懇惻實出至誠臣維劉典旣欽奉

諭旨幫辦軍務馳驅戎馬之日多臬司本任政務原難兼顧與其虛名徒擁兼有曠誤之虞不若本缺先開專期贊畫之效且幫辦與各省督撫提鎮例本平行公牘咨移無分高低若藩臬則爲階級所限不但於督撫有僚屬之義公牘用稟用申詳卽於提督亦例用咨呈不能稍亢軍興既久將士積功得官者多已擢至提鎮幫辦分統馭之權有指擡之實而本官階級有以限之督撫難冀其和衷提鎮每因以輕視於行間體制似有非宜可否仰懇

皇上天恩允開劉典甘肅按察使缺

賞給京銜幫辦陝甘軍務俾臣得收贊助之益感荷

鴻施曷有紀極如蒙

俞允甘肅按察使缺應請

迅賜簡放或卽以見署江西吉南贛甯道張岳齡補授并請

敕下江西撫臣劉坤一令率所部三營赴任亦期稱職該員曾經

臣奏調浙江未及赴浙其帶勇紀律嚴明勤慎敏幹臣所素知而

用之甘肅堪資坐鎮足令弁兵知法軍民相安也愚昧之見是否

有當伏候

皇太后

皇上聖鑒訓示施行謹 奏

奏稿卷二十一

重

同治六年正月十八日內閣奉

上諭甘肅按察使劉典著開缺賞給三品卿銜仍畱二品頂帶幫

辦左宗棠軍務甘肅按察使缺著張岳齡補授欽此

調廣東陸路提督高連陞隨同征剿片同治六年正月初十日

再臣奉

命調督陝甘時廣東陸路提督高連陞即函請隨同征剿臣以高連陞辦惠州嘉應土匪甫有頭緒正宜次第按治而臣所籌撥各省的餉尙無成數未敢遽行奏調嗣廣東撫臣蔣益澧屢函代籌西征將領亦謂高連陞所部江北人多久從征役調令西行自較得力臣亦未敢徑諾也茲接高連陞信知所辦各處土匪業已竣事地方較平廣東蔣益澧隨帶各營足資鎮壓而捻回人數太多臣軍不待入秦即有戰事入秦後又須兼籌防剿兵力未便過單相應請

奏稿卷二十一

十四

旨敕下兩廣督臣廣東撫臣迅調高連陞率所部九營由惠州嘉應踰嶺而北出贛州順流而下溯江抵鄂取道襄樊前進以爲臣軍後繼其行糧應由廣東籌給亦蔣益澧前函所許也并請敕蔣益澧於香港購辦上好洋槍二千杆及槍藥銅冒便交高連陞帶解前來以濟急需庶於臣軍大有裨益謹附片陳明伏乞聖鑒施行謹 奏

軍機大臣奉

旨另有旨欽此

同治六年正月十八日內閣奉

上諭陝甘總督一等恪靖伯左宗棠著授爲欽差大臣督辦陝甘軍務欽此

軍機大臣字寄同治六年正月十八日奉

上諭左宗棠奏敬陳籌辦情形請將劉典開缺另簡楊岳斌奏回捻勢將句結請敕鮑超入陝劉蓉赴涇西甯回匪日逞奸謀大臣受其挾制各摺覽奏均悉左宗棠所稱進兵陝西必先清關外之賊進兵甘肅必先清陝西之賊駐兵蘭州必先清各路之賊實爲動中竅要本日已授該督爲欽差大臣督辦陝甘軍務并令譚廷襄將封存關防一顆送交該大臣祇領矣摺內所稱採買馬匹練

奏稿卷二十一

五

習馬隊先造獨輪車應用俟所調各營取齊由襄樊出荆紫關赴陝抵陝後製造雙輪礮車兼雇買車輛俟採買口馬到陝增練馬隊并習車營一面開設屯田總局汰遣各營均著次第辦理陝西已有劉松山一軍在彼并收集湘果各營鮑超一軍亦已令其入陝該大臣若以所部先駐西安不慮無兵調度若必俟劉典等到營一同入關深恐有稽時日著卽見有兵力取道入關妥爲籌辦以副期望左宗棠未到以前喬松年務須懷懍遵疊次諭旨認真防勦勿稍大意劉典已開缺賞三品卿銜幫辦軍務著左宗棠催令卽日募勇到陝勿任逗留張岳齡已授甘肅按察使并著飛咨劉坤一飭令該司督率所部三營赴任藉資坐鎮楊岳斌請敕鮑超

速行入陝已疊經傳諭該提督星速進關援剿著左宗棠等再行嚴催劉蓉藉病不肯出省任意抗違致有灞橋之挫湘果各軍損傷大半見復與喬松年齟齬不合業經降旨將劉蓉罷斥斷難冀其得力楊岳斌所請令劉蓉赴涇之處著不准行并著喬松年酌度軍情派軍赴涇駐紮勿得視爲緩圖致回捻句結爲患益深西甯回匪日逞奸謀玉通將漢圍盡行撤去受其挾制將來必難自保楊岳斌見令孟柏林等仍行練習舊卒招募新軍著密飭妥爲豫備此摺著鈔給左宗棠閱看楊岳斌在任一日務須盡一日心力不得稍存退縮之見俟左宗棠將陝省底定方能息肩也高連陞一軍已諭令瑞麟蔣益澧飭令迅速赴陝洋槍等項卽令該提督帶解矣將此由六百里各諭令知之欽此

附前任陝甘總督楊岳斌摺

同治六年正月

奏爲西甯回匪日逞奸謀大臣受其挾制謹將詳細情形并
臣籌辦緣由恭摺密奏仰祈

聖鑒事竊照西甯回匪始以辯教爲名互相仇殺漸致兇鋒
日熾殃及漢民數年以來焚莊掠堡慘毒情形有加無已

臣於上年入甘後急思震以兵威拯救災黎祇以各路賊匪紛
乘兵力萬難分撥其時西甯辦事大臣玉通及湟郡漢回頭

目人等紛紛咨稟以漢回兩教均願共息爭端請臣派員查
辦等情臣明知回匪狼子野心萬難驟期向化而兵無可分

不得不暫示羈縻冀圖他日大舉遂派候補知府鍾瑛等前

奏稿卷二十一

七

往查辦安撫事宜殊回性反覆無常徒以乞撫爲名依然大

肆兇殘臣當卽令該府回省一面揀派總兵高得效副將孟

柏林從九沈發祥等分往西甯碾伯一帶將各莊舊有團練

重加整頓并另招募馬步勁勇訓練成軍聽候調遣詎回匪

欲緩師行狡狡百出又復向玉通乞撫玉通遂親赴各鄉偪

令漢民散團護西甯鎮總兵丹金札普署西甯道郭襄之署

西甯府達昌等專事逢迎與玉通聯成一氣亦祇知抑勒漢

民置回匪之焚擄淫殺於不問乃事不旋踵而辦撫回省之

知府鍾瑛中途被害矣畏法撤圍之果莽寺番僧遭賊荼戮

矣而玉通若未之聞也猶且大張示諭令各團局僧番漢紳

定期擇地與該匪面訂和好有言大兵臨境者官則拏問民則就地正法并將臣派高得效等練就十二團勒具和好甘

結以委員爲假冒以臣刊給關防爲私刻差派府縣胥役數

十人欲將孟柏林沈發祥等拘拏拷問以逞回匪之一快又有甚者涅屬北川營地爲通甘涼要路回匪屢思竄突護都

司韓廷連督率鄉勇認真堵禦賊少則出城擊剿賊多則守堡嚴防前後斃匪一千數百名三年之久地方得以無恙臣

以韓廷連戰守有功輿情愛戴爲武弁中不可多得之人批示嘉獎不意玉通因韓廷連久爲回匪所忌本年正月間密

令丹金札普親赴北川營意將械繫韓廷連交回目馬文義

奏稿卷二十一

天

處置幾動眾怒韓廷連因而得免而丹金札普旋將韓廷連

撤任另委守備褚義接署北川營都司事務自此該匪益無

忌憚西涅各屬搶殺頻仍任意由北川營竄往甘涼如入無

人之境玉通又分繕札文差送山丹張掖東樂及永固協營

等處意仍在漢回兩教共敦和好飭令地方文武查辦稟復

適東樂縣丞團總王執中惑於和議派人進山說合不期該

匪陽奉陰違糾集大股將防守山丹縣屬扁都口之兵勇營

盤乘間攻陷傷斃兵勇甚多見在該匪又環攻碾伯縣屬村

堡縣城十分喫緊此玉通虐漢縱回受賊指使據各處稟報

并證以臣所聞之實在詳細情形也伏思玉通等工於媚回

牢不可破祇爲一己苟且偷生遂不顧良民之慘遭毒害百姓痛心切齒亦且恬不知非其實西甯郡城城外之啟閉回匪司之公文之往來回匪折之官民之出入回匪主之雖無戕官顯迹而已陰踞城池玉通等受其挾制遂聽其主使正恐將來終難於自保臣百計圖維萬分焦急若不早規此匪日久更成不可收拾之勢見已密飭副將孟柏林等仍行練習舊卒招募新軍韓廷連在湟屬號召各路鄉團較爲靈應將該弁改署威遠堡都司以收後效一面商令護甘肅提督鄧全忠酌帶營勇馳往碾伯籌辦軍糧俟來春正二月間再派提督梅開泰一軍會合攻剿惟該回一聞師至或先據城相抗亦屬意中之事然若不急圖進兵則玉通爲回所用湟屬各廳縣之民終恐靡有孑遺此臣萬不得已之苦衷非敢於郡垣輕言棄置也至鄧全忠孟柏林等籌餉招兵爲回匪所深恨卽爲玉通所不樂聞因而該員等亦俱多畏縮難保玉通不又爲回匪偪脅或將臣派官弁飾詞彈劾蒙蔽天聰則惟有仰懇

聖明衡鑑俾實心辦事者鼓舞奮興臣之幸亦大局之幸所有西甯回匪詳細情形并臣籌辦緣由謹繕摺密陳伏乞

皇太后

皇上聖鑒

懇 恩敕下楊岳斌劉蓉悉力支持片

同治六年正月十日

再臣之到任既不能速而平生足迹未入關隴風土情形實難遽然諳悉况捻熾於東回熾於西兵情變幻靡常尤須熟練之人備諮訪而昭慎重楊岳斌劉蓉雖時艱適值經理未協機宜然在事日久尙能以勤民愛

國爲心

臣與該兩

臣相知有年自顧才力無以踰之曾經據實陳

奏可否仰懇

天恩敕下楊岳斌劉蓉於

微臣

未到任以前仍悉力支持勿因事

權不逮遽存諉卸之見庶

臣

得從容展布與該兩

臣

殫誠盡瘁冀

他日稍紓

奏稿卷二十一

三

朝廷西顧之憂謹披瀝愚忱伏祈

聖鑒訓示謹 奏

軍機大臣奉

旨楊岳斌疊經有旨責成將甘肅軍務妥籌整理准歸該督調遣劉蓉於捻蹤入陝後屢次催令出省終以抗違去冬灞橋之挫已降旨將其革職毋庸畱陝以爲疲玩者戒欽此

請派遣員總辦陝甘後路糧臺片

同治六年正月初十日

再甘餉多資東南協撥臣軍所有軍火器械多由閩浙粵東採購搭輪船運解鄂省由漢口轉解襄樊陸運取道荆紫關入陝應於湖北省城設立陝甘後路糧臺查有二品頂帶按察使銜湖南補用道王加敏廉樸勤幹歷司浙江閩浙總糧臺條理精密誠信不欺鹽運使銜湖北漢黃德道江漢關監督王文韶才長心細器識閎偉素爲中外信服以該兩員總辦陝甘後路糧臺收儲臣軍餉需製備器械隨時接濟必期無誤其襄陽應設水陸轉運總局荆紫關應設陸運分局陝西省城應設甘肅總糧臺均由臣路過各處時遴委賢能各員經理所有臣未到任以前各省應協甘餉仍

奏稿卷二十一

三

照舊解交楊岳斌糧臺收儲轉運以清款項而免膠轉理合附片陳明伏乞

聖鑒施行謹 奏

軍機大臣奉

旨知道了欽此

軍機大臣字寄同治六年正月二十二日奉

上諭楊岳斌奏病勢增劇懇恩賞假調理請敕催左宗棠等入甘一摺楊岳斌所陳患病情形覽奏實深廕系著賞假一箇月安心調理惟秦省匪勢鴟張左宗棠先須入關剿辦俟秦省底定方能移師入甘左宗棠未到以前楊岳斌責無旁貸仍著懷遵疊次諭旨力疾從公將甘省兵事餉事及各路防剿機宜妥爲調度儻有疎虞仍惟楊岳斌是問曹克忠前因患病赴陝見在計可就痊該員所部各營久無將領統率軍心不固時有潰散之虞著喬松年檄飭曹克忠迅卽馳回甘省統帶舊部埽盪逆氛儻該提督有託病遷延情事卽著喬松年據實參奏以警驕悍甘省軍事孔棘糧餉兩絀應如何全局統籌妥爲兼顧之處著左宗棠相機辦理將此由六百里各諭令知之欽此

附前任陝甘總督楊岳斌摺

同治六年正月

奏爲甘省事勢日難

微臣

病勢日增恐滋貽誤懇

恩敕催新任督

臣

左宗棠及提

臣

曹克忠迅卽來甘恭摺仰

祈

聖鑒事竊

臣

向帶水師於旱地軍務本屬不諳雖不敢稍辭

勞瘁往來奔馳究竟調度未合機宜以故軍務迄無起色自曹克忠回陝以後外間總統無人往往顧此失彼且省內照理無人更深根本之懼卽如藩司林之望自到任以來遇事顛預論其籌糧則無升斗論其籌餉則無錙銖有時信筆直書不求甚解於曾經入奏之件質證無據則云尙須待查於

奏稿卷二十一

三

已經詳報之文輒復取還則云尙未入目其昏憤糊塗大率

類此然使猶無嗜好或可將勤補拙也乃該藩司性耽麴蘖

終日醺醺且於五年三月十八日逆匪攻城燒殺甚慘內訌

外憂存亡呼吸而該藩司竟於是日娶妾入署獨爲娛樂然

使虛己和衷猶可因人成事也乃署臬司崇保與物無競該

藩司每存偏見輒祕不與會商蘭州道華祝三辦事實心該

藩司惡其得名遂轉而生妬忌總之該藩司口口炫暴已長

而實一無所長事事自謂能辦而實未嘗一辦故有林瘋子

之稱見值甘事如此

臣

才如此而操理財用人之柄爲

臣幫

手者又如此

臣

若避嫌畏罪而不言則雖勉竭駑駘扶病支

拄終恐不免貽誤此臣所以憂危惶懼而不敢不爲我

皇上剴切陳之者也相應請

旨敕左宗棠及曹克忠迅卽來甘以救甘事而維大局所有

甘省事勢日難微臣病勢日增恐滋貽誤懇

恩敕令左宗棠及曹克忠來甘緣由謹繕摺由驛五百里馳

陳伏乞

皇太后

皇上聖鑒訓示

奏稿卷二十一

壽

軍機大臣字寄同治六年正月二十三日奉

上諭前有旨授左宗棠爲欽差大臣督辦陝甘軍務因思山西與陝西毗連防堵甚關緊要擒匪業已渡渭沿河一帶尤須加意嚴防該省見派臬司陳湜帶勇防堵兵力尙單惟恐與陝西各軍聲勢不能聯絡左宗棠到陝後當妥籌兼顧所有山西在防各軍卽著歸該大臣節制調遣與陝西兵勇合力防剿以期聯絡聲勢互相援應力保完善兵行餉隨并著左宗棠咨商趙長齡於陝甘新疆應解各餉籌款源源接濟將此由四百里各諭令知之欽此

奏稿卷二十一

靈

軍機大臣字寄同治六年正月二十六日奉

上諭林壽圖奏甘省東路回氛猖獗分股西侵運道益梗陝臺移置漢中辦理報銷并陳慶涇可慮情形各摺慶陽被困已久穆圖善尙在中衛庫克吉泰等亦一時不能赴援雷正綰勢力不支涇長均遭蹂躪該匪復挾同游勇從宜君耀州富平三原竄擾蒲城渭南臨潼等處至大荔之八女井王閣村盤踞潘驛同朝完善之區人民惶亂邠長門戶空虛未籌防堵本日已諭令穆圖善迅赴慶陽喬松年派兵赴邠長一帶防勦惟捻回蹤迹已近難保不暗中勾結穆圖善喬松年均恐不能抵禦著左宗棠統籌全局入關調度務須保固同朝等處兼顧山西完善之區勿令回氛肆擾鮑

奏稿卷二十一

美

超一軍已在鍾祥地方大獲勝仗鄂軍足數剿殄該大臣卽督同鮑超入陝以資得力林壽圖摺內所稱雷正綰聞被捉放回及喬松年議加釐改捐每遇署缺不由司擬輒先授意而於諸將未有指揮各等情著左宗棠於到陝後密查具奏林壽圖所陳糧臺既改漢中各省應解慶陽協餉甘省應支慶涇月餉應統歸陳丕業辦理請敕陝甘總督湖廣督撫迅催候補道陳丕業限二月初旬由荆紫關馳抵漢中督辦各局事務卽著左宗棠咨行湖廣督撫催令該員剋日前往悉心妥辦無稍遲延陝甘待餉孔急并著左宗棠照林壽圖摺內所稱咨行鄂臺將六年三月以前已解到鄂各餉均兌運西安并前次撥准之山西河東各五萬兩由左宗棠

飛催該撫飭司道如數速解以救眉急林壽圖另片奏請敕左宗棠審量進兵之路先籌糧運之區庶免臨時掣肘等語著左宗棠竭力籌畫以期軍食有資林壽圖摺二件片一件均著鈔給左宗棠閱看將此由六百里諭令知之欽此

奏稿卷二十一

軍機大臣字寄同治六年二月初一日奉

上諭喬松年奏陳近日軍情并回逆竄陝派兵剿辦情形一摺張逆在秦渡鎮一帶糾賊抗拒劉松山等軍併力進擊已移營逼近賊巢而甘省逆回突由宜君竄及耀州蒲城等處喬松年派令總兵劉厚基副將何玲必各軍從同州臨潼兩路分途截剿著卽嚴檄劉厚基等實力扼堵毋任此股賊匪與捻股合併肆行蔓延其長武大荔各境亦有回逆竄擾此股賊匪恐非宜君同夥究係由何處竄至據實察覈具奏所稱庫克吉泰德興阿前隊已抵朝邑該處近連大荔當可乘機掩擊惟該將軍所部僅有馬隊一千該撫自當酌派隊伍交庫克吉泰合力堵剿以厚兵力蒲城富平一帶賊復遠颺仍著飭令劉厚基一軍跟蹤追剿毋令喘息陝甘交界處所回匪羸聚終恐句合捻逆牽掣官軍左宗棠未到以先喬松年責無旁貸務當振刷精神激勵諸軍實力防剿毋得貽誤事機陝西情形緊迫左宗棠務須迅籌入關以資督剿劉松山一軍近日曾否接仗仍著囑令穩慎進攻以期節節掃盪大荔與晉省僅隔一河并著該撫咨會趙長齡妥籌防範勿稍疏虞將此由五百里各諭令知之欽此

甘省糧餉兩絀謹擬籌辦情形摺

同治六年二月初三日

奏爲甘省糧餉兩絀謹擬籌辦情形仰祈

聖鑒事竊各省欠解甘餉爲數甚鉅諸臣同任封圻豈有坐視西陲危急不思拯救之理細察彼此情形實亦有自顧不遑協濟過多難於兼顧者似宜

敕令各就本省情形籌擬實解確數按月委解以期實濟其用兵省分時艱同值旣難責其舍己芸人其協濟過多省分勻撥維艱亦難望其挹彼注此前奉

諭旨敕

臣

委員分赴各省守催竊維各省盈絀情形外省原難驟

奏稿卷二十一

五

酌情形妥速籌解如其籌措無從力所不逮雖部檄頻催臨以朝命有時勉強塞責一二次後亦必無以應之外省委員仰鼻息於鄰封但能工其所請之詞萬無加以迫促之事守催祇託空言撥解終無實濟甚有羈累他鄉求隨同衙參不可得資斧告竭求銷差盤費而亦難者是委員守催仍難期有確數之實在情形也合無仰懇

天恩敕下欠解甘餉各省督撫令其各就本省情形悉心籌議協甘的餉其用兵省分照該省見在軍營人數餉數暫時勻出十成之一協濟甘餉責成各藩司關道按月委解由該督撫臣按季奏報其協撥軍餉無軍務省分准各督撫臣察酌各軍得力與否酌

擬減撤應協兵勇請

旨定奪其所減撤之餉仍卽按月勻加甘餉至捻回竄驟省分如河南陝西則暫時自顧不遑尙盼鄰省協濟更何能分潤甘省應卽請

旨停其報解以昭覈實至滇黔兩省援師其餉源專在蜀湘亦應敕令川督湘撫以勦爲防分別撤減其素不得力諱敗爲勝督辦援黔軍務之兆琛則虛糜湘餉及各省捐輸爲數甚多於黔無益應請

敕令湖南撫臣竟將該軍分別撤減另擇勇幹大員代其統領以收餉節兵精實效其甘肅口外各軍此時陝甘軍事方殷無論力難及遠卽有餘餉足供撥濟亦虞道梗不前應請

奏稿卷二十一

早

敕部察明其業經出塞各軍固應照常設法解濟以資飽騰其尙未出塞各軍應暫停前進改所撥之餉暫解甘肅糧臺以資分勻撥解庶期通力合作無偏累之苦均則無貧而各省量力而行不強以所難自可漸臻實際此甘餉之亟應爲籌畫者也至隴外兵燹之後地畝荒蕪糧食無從採購又地勢間隔無水路可通陸路轉饋極形艱阻前奉

諭旨川省採米入甘轉運維艱著崇實駱秉章除每月應解成祿軍營餉銀一萬兩外卽將該省按月協銀二萬兩派員徑解漢中交英奎採辦以省糜費欽此查漢中採米入甘陸路亦頗迂阻而

餉道貴多途購運乃免匱乏梗阻之虞訪聞川北嘉陵江白水江上下游一帶素稱產米之區四川廣元昭化兩縣水道與甘肅鞏秦所轄相通若川省肯於保甯順慶兩府設立米局採米雇船運送廣元昭化由廣元昭化撥換船筏溯流而上或另雇駝騾腳夫剋期運解擇地存儲甘省委員迎解軍前取攜自便視楊岳斌專恃漢中購運一途較爲寬綽應請

敕下四川督臣四川藩司悉心集議力保飢軍如甘省軍務早有起色四川亦可紓一面之防是爲甘肅計者亦卽所以爲四川計崇實駱秉章江忠濟素抱公忠當不稍存膜視其米價運腳容臣於臣軍餉項內陸續劃撥免致偏累川省至楊岳斌任內應有甘

奏稿卷二十一

聖

餉仍歸楊岳斌收用臣未受篆以前萬無攘奪之理所有臣軍餉項由臣所設糧臺收存運解一則畧劃分明將來報銷易辦一則彼此同值時艱不容顧此失彼也籌擬情形是否有當伏乞

皇上訓示施行謹 奏

軍機大臣奉

旨另有旨欽此

同治六年二月十一日內閣奉

上諭前據左宗棠奏於浙閩廣東酌派西征的餉并令浙江劃撥江蘇月餉當經諭知曾國藩等遵照辦理茲復據左宗棠奏稱欠解甘餉各省督撫亦有難於兼顧者請敕就各省情形擬定實數按月委解其用兵省分酌減人數餉數勻出十成之一協濟甘餉其無軍務省分或將該省防軍酌減協濟甘肅兵勇仍按月勻加甘餉以期通力合作各等語甘肅餉項支絀必得各省協濟第軍務未平派解較多各省亦難兼顧莫如由該省督撫就各省情形酌定數目按月報解較有實濟左宗棠所陳亦係權宜辦理卽著曾國藩崇實駱秉章譚廷襄曾國荃閻敬銘趙長齡劉坤一李瀚

奏稿卷二十一

聖

章郭柏蔭丁寶楨酌量情形每月究能撥解若干據實具奏按期撥解其或裁減兵勇勻出月餉或派得力之軍赴甘助剿均著酌量妥籌辦理毋許徒託空言左宗棠又奏稱四川嘉陵江白水江上下游素稱產米與甘肅之鞏秦接壤若於保甯順慶設立米局雇船由廣元昭化換船上溯或雇夫運解於甘省軍食有神自係爲甘省採糧艱難起見第聞該處水路崎嶇轉運甚屬不易而甘省採糧維艱亦不可不多方籌備著崇實駱秉章督同江忠濬悉心籌畫迅卽興辦以資接濟其米價運腳仍由左宗棠按數撥還免致偏累欽此

籌擬購練馬隊摺

同治六年二月初三日

奏爲籌擬購練馬隊懇

恩敕下察哈爾都統吉林阿勒楚喀副都統妥速分別辦理以濟實用事竊維西北戰事利在戎馬東南戰事利在舟楫觀東南事機之轉在礮船練成以後可知西北事機之轉亦必待車營馬隊練成以後也春秋時晉侯乘鄭之小駟以禦秦爲秦所敗是南馬不能當西馬之證漢李陵提荆湖步卒五千轉戰北庭爲匈奴所敗是步隊不能當馬隊之證見在捻回猖獗官軍征剿多年尙未蕲事於時急圖埽盪固我疆宇非講求步隊馬隊不爲功而欲善步隊馬隊之用又非講求步隊馬隊之利不可臣謹就愚陋之見爲我

奏稿卷二十一

望

皇上敬陳之捻回之害在平原曠野本騎之利官軍以步隊當之鮮不被其輕軼矣於是而圖制賊之長宜用車營助步隊遏其突騎固也然車營步隊足以遏突騎守雖有餘以之抄截追剿戰尙不足則練馬隊爲急以馬力言之西產不若北產之健以馬隊言之西北之人不若東北之雄

祖宗龍興東北平定中原中葉以來平準回靖朔漠

神武震鑠跨越古今敬繹

列聖方略官書竊以爲欲平方今之患非追法

先世遺烈其道末由也回馬多由西產捻馬多掠零騎故捻之患

尙劇於回所幸者捻回之馬雖多至數萬騎然均用之野戰非如官軍隊伍鈐束之不可撼捻回諸逆人各一心非如官軍節制賞罰之不可亂捻回馬上多用長矛非如官軍槍械火器之不可敵誠於此時購北口良馬得其人習練而節制之庶制勝有其具而賊不足平且可藉閱歷以造就人才爲

國家固根本垂久遠之計謹擬採購口馬選練馬隊兩端乞聖明採擇行之一馬貴精選也口北產馬之地如張家口爲採購總匯之所軍興以來用馬過多善馬難得此次擬採買三千匹聊濟急需原貴精不貴多之意伏懇

敕下察哈爾都統察酌情形如張家口各處一時不能精選足數

奏稿卷二十一

四

或移咨歸化城將軍就近選購務爲驗別揀口輕騰壯之馬精益求精足三千匹一俟吉林所募礮手行抵都門分起順解來營庶口馬到後即可派員編成札蘭管帶訓練以期迅速一馬隊宜慎募也東三省兵力素稱勁健惟根本重地不宜調發太頻聞吉林所屬地方滿漢獵戶名爲礮手平日習騎耐勞徵逐猛獸火槍最準膽力俱壯實爲馬隊之選軍興以來未嘗選募從征材武之士鬱勃山澤間殊爲可惜伏懇

敕下吉林阿勒楚喀副都統德英於吉林所屬各處旂民臺站各丁內挑選槍馬嫻習年力精壯礮手二千五百名并購辦鞍韉三千盤作爲六起每起編成五札蘭由德英於通省實缺協佐領內

揀委營總并於實缺及卽補防禦驍騎校官內選派各札蘭正副
各官權爲管帶按照營制每馬隊百名募長夫四十名沿途驛站
照例支應車輛餵養草料由直隸山西過河入陝計算時日微臣
早已馳抵西安得以及時編列成軍俾成勁旅庶用其所習取材
既精自可盡其所長無堅不破臣聞德英從前隨同伊興額在淮
北等處勦辦捻逆威望卓著署吉林將軍時值馬賊肆擾能守能
戰省會保固無虞深得旂民之心此次選舉礮手最爲要著伏懇
敕下該副都統一手料理必能糾集豪俊共埽狂氛并令該副都
統如有經辦應行奏報事件會同吉林將軍隨時具奏仍懇

敕令吉林將軍督同地方滿漢各員幫同妥爲招募至鞍馬價銀

奏稿卷二十一

呈

及選舉礮手經費并懇

敕吉林將軍察哈爾都統於各該庫存項下暫爲劃撥由臣解還
歸款如該兩處庫存不敷撥給卽仰懇

天恩敕下戶部先爲籌撥一面行知山西巡撫於協甘月餉項下
提還歸款俾免延待之虞感荷

皇仁尤無旣極至招募礮手經費及薪水口分章程臣拜摺後卽
一面開單咨請兵部轉行吉林阿勒楚喀副都統知照合併聲明

謹 奏

軍機大臣奉

旨另有旨欽此

採買戰馬請免稅片

同治六年二月初三日

再各省採買戰馬與尋常添補營馬驛馬不同歷經奏蒙

恩旨免稅此次請

旨敕令察哈爾都統選購戰馬俟吉林挑募礮手抵京後順解陝西習練馬隊自應仰懇

皇恩俯准敕部移行各處按數查驗免稅放行以利征餉謹附片具奏伏乞

聖鑒施行謹 奏

軍機大臣奉

旨另有旨欽此

奏稿卷二十一

吳

請 敕喜昌假滿赴營分統馬隊月

同治六年二月初三日

再臣自抵鄂後即以習練馬隊爲事陸續覓買口馬僅得四百六

十餘匹蓋因捻氛甚熾道梗不前馬販稀至也臣隨營舊部馬隊

員弁雖膽技尙優然未習北方戰事結隊列陣終欠圓緊以之剿

捻剿回難期確有把握久聞湖北軍營副都統銜吉林滿洲鑲紅

旂協領喜昌深諳馬戰人尤廉正心竊敬之適喜昌告假養傷回

旂比卽敦請來營教練挑選員弁勇丁將新購口馬拴養騎操漸

臻熟練喜昌所論北方戰事多閱歷有得之言與臣所存諸心未

敢遽以爲是者默相契合臣深惜用之者未能盡其長也因與商

定俟六箇月假期滿後迅速赴陝分統馬軍喜昌亦慨然諾之將

奏稿卷二十一

七

來德英選募礮手喜昌回旂後亦可幫同照料合無仰懇

天恩敕下吉林將軍富明阿俟喜昌回旂催令於假滿後分統新

募馬隊迅速赴臣軍聽候差委俾臣得資指臂之助謹附片陳明

伏乞

皇上聖鑒訓示施行謹 奏

軍機大臣奉

旨另有旨欽此

軍機大臣字寄同治六年二月十一日奉

上諭左宗棠奏籌擬購練馬隊請免馬稅并請調喜昌赴營各摺
片左宗棠見在督兵剿辦捻回必須先練馬隊以資得力吉林所
屬地方獵戶平素習騎耐勞火槍有準頗屬可用著富明阿德英
於旂民臺站各丁內挑選槍馬嫻習年力精壯礮手二千五百名
并購辦鞍韉三千盤作爲六起每起編成五札蘭并著德英於通
省實缺協佐領內揀委得力營總并於實缺及卽補驍騎校官內
選派札蘭正副各官權爲管帶以資約束每馬隊百名另募長夫
四十名所有挑選事宜卽由德英專辦并著富明阿飭令地方各
員幫同辦理務期迅募足數不可推諉遷延致滋貽誤所需戰馬

奏稿卷二十一

吳

三千匹著裕瑞於張家口各處如數購買務擇口輕臆壯之馬精
益求精不得以疲瘦老羸充數如張家口各處一時不敷採買卽
著裕瑞移咨福興桂成在歸化城就近精爲選購統由裕瑞親爲
驗別毋許稍有含混此項馬匹俟吉林所募礮手行過京師時由
裕瑞解交該營總驗收轉解左宗棠軍營其應需鞍馬價銀及選
募礮手經費卽著富明阿裕瑞於該處庫項暫爲劃撥由左宗棠
解還歸款如不敷撥給卽著戶部先行籌撥於山西協甘餉項內
提撥歸款經過地方馬稅均著免其交納吉林佐領喜昌見在告
假回旂著富明阿飭令於假滿後統帶新募馬隊仍赴左宗棠軍
營聽候差委將此由五百里各諭令知之欽此

漢陽府知府鍾謙鈞請助餉隨征片

同治六年二月初三日

再臣駐營漢陽橋口據鹽運使銜卓異候陞漢陽府知府鍾謙鈞赴營具呈請奏開漢陽府知府本缺隨臣行營當差并將養廉銀二千兩捐充陝甘軍餉聲明從征或有微勞不敢仰邀獎敘比經面詢據該員稱謙鈞一介寒微素耐勞苦以巡檢末員疊經胡故撫院保至知府蒙

皇上天恩簡放漢陽府知府受

恩深重寤寐難安自揣年逾六十精力未衰當茲西事方殷不敢自圖安逸願赴軍前充當苦差不敢希冀保舉所捐廉銀本出自辦公樽節之餘目覩甘餉窘乏未忍私爲溫飽之計情詞肫懇惻

奏稿卷二十一

晃

惻動人臣因該員稟中有并稟督撫之語比告之譚廷襄函商曾國荃接准曾國荃兩覆極稱該員操守清嚴志節過人應畱之漢郡以順輿情捐廉助餉則聽其便臣維軍旅之才易求守令之選難得鍾謙鈞既以廉惠著聞又曾國荃方圖整飭吏治需才之際自毋庸奏調軍營所擬助餉之款雖出該員一片至誠深維朝廷設立養廉之義仍應還之以勸廉吏當經批飭遵照矣所以附瀆

聖聰者西事艱危之際人視爲畏途鍾謙鈞獨奮然請往有安受勞苦之實心無希求榮利之鄙念足以風勵末俗不敢壅於

上聞謹據實附片陳明伏乞

聖鑒訓示謹 奏

軍機大臣奉

旨知道了欽此

奏稿卷二十一

五

軍機大臣字寄同治六年二月十六日奉

上諭喬松年奏甘回竄至鄜州請敕庫克吉泰等先剿鄜州之賊并催左宗棠赴陝各摺片覽奏均悉另股回匪由三水東竄前股已至三原滋擾喬松年已飭劉厚基會同劉效忠合擊復有大股逆回數萬句結土匪潰勇同時竄至鄜州境內段登雲一軍不能抵禦該逆已深入滋擾中部宜君邊境皆見賊蹤庫克吉泰德興阿已抵同州著卽帶兵趕赴鄜州毋庸再行進省致多迂折并著喬松年飭令劉厚基等軍迅將西路一股擊退移軍往鄜州協剿以厚兵力其由藍屋西竄郿縣之賊該撫當催令劉松山等躡剿仍須步步爲營未可稍涉大意另片奏陝省旣患兵弱尤患財殫

奏稿卷二十一

至

請催左宗棠攜銀帶兵到西安徐圖規畫等語左宗棠見駐漢口慎重籌畫未便輕進朝廷亦深知其苦心惟見在陝省萬分緊急若非該大臣就見有兵力寬籌餉項迅赴西安調度恐軍心民心日形渙散設如喬松年所慮該大臣將來挽救更多棘手該大臣務當先其所急迅往鎮壓并以屏蔽晉豫斷不令遽行入甘致礙該大臣種種布置鮑超一軍見已畱鄂剿賊湘淮諸軍亦俱到鄂後路尙可無虞該大臣卽酌度援應以紓廩念喬松年片一件著鈔給左宗棠閱看將此由六百里各諭令知之欽此

軍機大臣字寄同治六年二月十九日奉

上諭裕瑞奏遵旨採辦馬匹因時變通一摺據稱春令青黃不接之時購馬實難庫儲支絀馬價亦難籌畫擬於官羣內選馬一千匹由蒙古各旗捐馬一千匹再行移咨福興等或買或捐採辦一千匹分起解京等語官羣馬匹臚分不齊設或勉強湊數必至貽誤事機著裕瑞詳加選擇務須臚分一律肥壯方堪應用蒙古各旗捐輸之馬亦須認真挑選不得以疲羸充數此項馬匹俟吉林礮手行過京師卽著分起解交該營帶往左宗棠軍營毋許延誤所短之馬著福興桂成趕辦臚壯戰馬一千匹無論或捐或買總期迅速辦理至由歸化城進殺虎口解交該營自比張家口較爲

奏稿卷二十一

三

便捷卽著福興購辦齊全時自行驗明解交吉林營總驗收毋庸轉由裕瑞點驗以免紆折至官羣馬匹亦關緊要著左宗棠將馬價解交察哈爾由裕瑞買馬一千匹以補官羣之額左宗棠著仍遵前旨一面先期赴陝不必坐候新籌馬隊以致久延將此各諭令知之欽此

軍機大臣字寄同治六年二月二十七日奉

上諭前據左宗棠奏抵甘需時請暫畱楊岳斌在甘辦理本日據楊岳斌奏稱八旬父母患病沈重而該督病亦增劇請敕穆圖善暫署督篆覽其情詞懇切實不忍再行挽留因令穆圖善馳赴蘭州暫署督篆以便楊岳斌交替回籍惟穆圖善西赴省垣東路防務恐無人認真堵禦該大臣到陝後尙須經理關中回捻各匪方能赴任則東路防務實爲陝省門戶要區左宗棠此時計可起程入關著於馳抵西安後斟酌情形相機辦理免致掣肘將此由五百里諭令知之欽此

由鄂啟行摺同治六年二月二十三日

奏爲臣軍由鄂啟行恭摺由驛馳報仰祈

聖鑒事竊臣所謂各營於本月上中兩旬陸續到鄂臣逐加點驗

舊部尙多當卽分撥車礮酌增槍隊編爲前中後三路十五營臣

自統親兵營十哨及先鋒後勁新前新後四營旂馬隊五起以利

分布二十日令提督銜總兵劉端冕總兵周紹濂率前路中路十

營啟行二十四日臣率提督銜總兵楊和貴後路五營馬步各營

旂繼進擬由雲夢德安隨州以達襄陽其劉典所募之四營亦已

到鄂臣飭暫駐漢口俟劉典率親軍左右兩營及後營到鄂隨同

前進其中書科中書吳士邁之宗岳兩營新授甘肅臬司張岳齡

奏稿卷二十一

七

之平江三營廣東提督高連陞之果勇八營則尙無來鄂消息也

適據探報捻逆大股復自鄂皖交界二郎河等處回竄廣濟鄂軍

獲捷賊復繞竄蘄州蘄水鄂軍迎剿失利勢甚猖獗臣軍前進沿

途或有戰事惟當慎以圖之冀紓

慈廛前奉

諭旨務須保固同朝等處兼顧山西勿爲回氛肆擾臣維河防之

要必先由潼關兜剿而西而臣軍不能速進鮑超所部馬步全軍

原擬由荆紫關入秦臣奉

諭後比卽恭錄咨行并函商於過荆紫關過龍駒寨後取道畱仙

坪出大峪口以達潼關頃得其覆函以荆紫關一路山徑崎嶇難

以整隊遊行改由宛洛以入潼關本月十五日已由樊城啟行臣
軍到襄樊時鮑超全軍必已由潼關入秦如同朝有警自可渡渭
援剿臣軍行過龍駒寨時亦當相機兼顧竊計解凍以後河防宜
易爲力也愚昧之見合併陳明伏乞

聖鑒訓示施行謹 奏

軍機大臣奉

旨另有旨欽此

奏稿卷二十一

壹

請散捻逆脅從片

同治六年二月二十三日

再此次捻逆分犯秦鄂官軍將領勇銳素著者如郭松林張樹珊劉銘傳等均作敗局鮑超劉松山劉維楨等雖曾獲勝仗而悍鷙之賊究鮮損傷且鮑超正月二十二日戰事亦頗有損失兇鋒甚熾實較髮逆尤爲難辦傳聞捻逆初起伎倆亦本無他因前此剿捻各軍失利時弁丁多被裹脅始以勉從爲偷活之計繼因畏罪而成反側之奸賊中所號爲北隊者不獨江北河北之人居多聞東北馬軍亦頗不少官軍以步敵馬以剽銳之軍當忍鷙之寇彼已形勢既殊輕用其鋒徒張賊焰此剿捻之難甚於髮逆而剿髮逆之戰法未可施之剿捻者也臣新集之軍絕少閱歷默察各將

奏稿卷二十一

奏

領亦多恃勇輕賊之心臣頗憂之見因西事孔棘師期不能再緩祇可於沿途勤加訓練一面遠發偵探整齊隊伍以備不虞遇賊交鋒恐難縱擊窮追爲乘勢趨利之舉也至捻中北隊一起其中蒙面喪心甘爲賊役者固屬法所難寬其因畏罪懼誅之故偷息草間情出無奈者如能反正歸誠似尚可稍從曲貸可否仰懇天恩寬其既往許其悔罪自贖以廣

皇仁伏候

聖裁訓示施行謹 奏

軍機大臣奉

旨另有旨欽此

懇 敕察閩中蜚語片

同治六年二月二十三日

再臣接准署閩浙督臣英桂護福建撫臣周開錫函牘知閩中有新刻竹枝詞於督撫司道徧加詆毀其刊本由候選道丁杰遞與鹽道海鍾比經英桂據實具奏臣等奉職無狀致蜚語流播上瀆宸聰愧悚奚似以古人聞過則喜止謗莫如自修之義言之臣等雖遭訕謗均當於內省之餘倍深刻責豈可謂人言奚恤遽存自是之心婢直自將稍涉忿爭之迹惟是閩中吏治軍政海防經近時切實整理甫盼轉機而一二失意之徒竟敢造作語言信口雌黃希冀搖撼大局實於時政有關可否仰懇

皇上天恩敕下新任督撫臣按款察明據實奏辦以端習尚而別是非其於閩中吏事不無小補謹據實附陳伏乞

聖鑒訓示謹 奏

軍機大臣奉

旨另有旨欽此

軍機大臣字寄同治六年三月初三日奉

上諭左宗棠奏督軍由鄂啟行請散捻逆脅從閩中新刻竹枝詞請敕查辦各摺片覽奏均悉陝省捻回合擾亟須知兵大員前往調度該督聲威素著一經入秦坐鎮自可騰出陝省兵力併入前敵以利攻剿所有置造軍械及練兵籌餉各事宜即可於到秦後統籌全局次第經理庶將來肅清兩省計出萬全昨據李鴻章奏鮑超一軍由南陽取道信羅至光固一帶當諭令鮑超無論任賴等逆竄往何處何路有警卽行兼程進擊見在該督旣已西行秦中自可無虞而鄂省賊眾兵單剿辦殊難得手鮑超一軍著仍遵前旨畱於鄂豫將任賴逆股剿滅再行移師入關前據英桂奏丁

奏稿卷二十一

奏

杰交出竹枝詞鈔錄呈覽匿名揭帖例應立案不行惟恐有挾嫌汗衊情事已諭令英桂吳棠面傳丁杰切實研究該督公忠共信公道自在人心也所稱捻中北隊一起裹脅居多請准令悔罪歸誠等語已諭令李鴻章譚廷襄曾國荃出示曉諭妥籌辦理矣將此由六百里諭令知之欽此

喜昌請假回旂咨送引

見片同治六年二月二十三日

再前臣奏調湖北軍營告假回旂養傷尙未啟行之副都統銜吉林滿洲鑲紅旂協領喜昌來營教練馬隊見在馬隊漸臻嫺熟據喜昌稟稱協領於咸豐九年二月補授協領實缺至同治四年二月已屆六年俸滿例應赴部引

見比經前任兩湖督臣官文因湖北邊防喫緊未便離營并出具考語於八月內附奏九月初二日奉

旨著照所請兵部知道欽此欽遵各在案見值請假回旂道經京城請給咨送部引

見等語查該員見經臣奏明奉

奏稿卷二十一

堯

旨俟假滿後仍赴臣營聽候差委茲據稟請給咨送部引

見前來臣察核無異除將履歷備文咨部外理合附片陳明伏乞聖鑒訓示謹 奏

軍機大臣奉

旨喜昌到京著該部迅卽帶領引見并催令該員假滿後速赴左宗棠軍營聽候差委欽此

軍機大臣字寄同治六年三月初九日奉

上諭喬松年奏近日軍情并段登雲所部潰擾一摺甘省大股回逆勢將盡與捻合左宗棠見已起程著卽兼程前進與喬松年會商勦辦段登雲所部勇丁在鄜州劫獄擄庫該總兵旣不能禦賊又約束無方著卽革職不准畱營以示懲儆署知州田景瀛疏於防範著一併革職暫行畱任陝省軍政久弛左宗棠喬松年當申明紀律嚴定賞罰以挽積習所有滋事勇丁卽著嚴拏懲辦并將此軍勇丁應畱應撤酌量妥辦毋令從逆生事鮑超一軍前已諭畱鄂皖勦捻左宗棠帶兵入關後騰出陝省兵力合併郭寶昌劉松山兩軍計敷目前分布該大臣當遵前旨坐鎮關中妥籌勦辦陝省探報多有爲從逆之潰勇所誤該大臣等宜詳慎審察將此由六百里各諭令知之欽此

陳明行期未能迅速摺

同治六年三月十八日

奏爲

微臣

行期未能迅速據實陳明仰祈

聖鑒事竊臣於前月二十三日馳報啟行日期後二十四日行抵

黃陂縣灑口地方適捻逆聞臣軍將到又於是日回竄麻城黃岡

一帶地方時鄂軍新挫漢黃一帶僅祇曾國荃所部竭力支持殊

苦單薄漢口爲湖北巨鎮鄂省餉源攸繫臣所部雖係新集之軍

漢口尙恃以爲固若遽拔營前進恐賊乘虛突竄未堪設想適聞

鮑超一軍經李鴻章奏調赴鄂奉

旨允行比卽飛咨催其速來俾臣得以專意西征庶期兼顧并函

告徘徊襄樊引疾乞退之不可三月初四日探報捻賊於是日又

奏稿卷二十一

李

已竄至黃陂縣城下蹤迹向楊店一帶竄動其疾如風臣比飭劉

典所部五營速進灑口填紮臣壘臣於初六日由灑口前進駐營

雙廟連日探報賊已由小河溪兩河口等處擾竄孝感雲夢一帶

臣擬繞道出孝感雲夢擊之比至孝感則賊已西竄應城鄂軍已

躡蹤而前矣曾國荃前探賊意西趨舊口希圖偷渡漢水擾鄂西

一帶完善地方臣軍盤獲賊探及逃出難民所言皆同曾國荃咨

催淮軍之在麻城及在安徽太湖河南信陽州者分道前來其鮑

超一軍亦咨其前赴安陸府屬洋梓雙河一帶遙合長圍漸偏漸

進聚而殲之籌畫本極周妥頃據探報賊果由阜市西趨頭隊已

抵舊口矣臣軍於十六日行抵德安府城擬稍停數日俟淮軍霆

軍有來鄂會師信息卽由隨棗取道襄陽劉典已帶親兵馳抵灑口數日亦可繼進臣到襄陽後先雇車馱待其來會彼時如捨逆尙在舊口計淮寔各軍當已遙合長圍臣軍自無中道逗留之理當卽整旆入秦如淮寔各軍未到之先賊已由舊口竄安陸隨棗以向襄陽臣軍必有戰事臨時再當馳報所有軍行遲滯緣由謹據實馳陳伏乞

皇太后

皇上聖鑒訓示謹

奏

軍機大臣奉

旨另有旨欽此

奏稿卷二十一

奎

遵 旨寬籌餉項以支危局同治六年三月十八日

奏為遵

旨寬籌餉項以支危局恭摺馳陳仰祈

聖鑒事竊臣欽奉

寄諭就見有兵力寬籌餉項迅赴西安調度仰見

聖謨廣運軫念西事艱難急圖補救至意臣維甘肅餉事向恃外

省協濟陝西餉事向恃本省錢糧非若東南各省有大宗釐稅關

稅堪資挹注近值捻回疊擾窘迫殊常撫臣喬松年亟盼臣赴西

安者非惟藉有餉之軍以辦賊亦冀分臣軍之餉并哺秦軍也竊

陝甘先祗期回今并剿捻兵力必需酌增先祗籌甘餉今并籌秦

奏稿卷二十一

奎

餉餉事愈形迫促臣未接篆以前各省協甘之餉仍擬解甘其由

臣奏定的餉解濟臣軍者福建每月四萬兩廣東每月四萬兩浙

江每月加給二萬兩而已以之支給臣軍餉需約計每月已短四

五萬兩臣入秦後需用更繁更急各省協餉由東南解秦程途遙

遠水陸數易計非百餘日不能解到各省縱按月起解在陝甘得

餉已在數月之後此數月內縱機有可乘亦不能不停兵以待此

常不及之勢也外省協餉解到立即分給各營而軍士以之清還

逋欠劃扣糧價已無涓滴存畱促其轉戰而前未到之餉又難預

為期必非若東南各省有釐局可以指撥錢糧可以劃提鄰疆可

以挪借此又常不足之勢也賊之難辦甚於各省餉之難籌亦甚

於各省若不早爲之所何以救危迫而利戎機乎竊維從前江蘇滬防喫緊時曾有由關督出印票督撫加印向洋商借銀充餉成案臣在福建亦曾行之事賴以濟上年臣在閩啟行之先福州稅務司布浪聞臣西征有期詢臣需借餉與否臣比以各省協餉數目不知其詳未之應也聞外國每遇有兵事貸兵餉於眾商指稅項歸款商情樂從事亦易集中國仿照行之未爲失體茲當陝甘餉需艱窘之時較前此蘇州福建奚啻倍蓰與其入秦後因待餉之故遇事牽制坐失機宜曷若籌借鉅款一氣貫注所損者微而所益者大比飭臣軍上海採辦轉運局委員福建補用道胡光墉試就上海洋商議借銀一百二十萬兩照江蘇辦過成案由關稅

奏稿卷二十一

查

項下撥還茲據胡光墉稟復見與洋行議定允借惟據洋商稱見值絲茶兩市方興需用甚多其息銀須較前加一二釐以示體恤臣已允其咨會海關各省督撫臣將各省同治六年七月起十二月分止六箇月應協甘餉銀數咨行閩海各關監督出印票督撫加印向洋商借銀一百二十萬兩迅將印票發交胡光墉會同江蘇蘇松太道應寶時與洋商交割一面卽由匯票局匯兌山西解州一面遴委員弁持匯票迅解臣營由臣給印諭提用以期便捷計閩海關代借銀二十四萬兩粵海關代借銀二十四萬兩浙海關代借銀四十二萬兩江漢關代借銀一十二萬兩江海關代借銀十八萬兩均由各關監督出付印票并由督撫臣加蓋關防給

洋商收執在本年七八九十一十二等月各關關稅項下撥還
洋商除江海關本係應協甘餉外其餘各關代借銀兩仍由各該
省藩司按月撥交各關以清款項所有息銀匯費應請

旨准由臣分別報銷此項銀兩還借均照關平將來協餉抵解關

庫其補平銀兩由各省藩司補足統歸甘餉內劃扣似此設法籌
借在各省仍祇按月應協之款并未提前在各關旋墊旋收并無
增損在各督撫臣祇經手過目并無煩勞在陝甘費十餘萬兩息
銀先得百二十萬兩應手之見餉相其緩急通融撙節集事可遂
調度可靈微臣得壹意經理盡瘁驅冀收薄效以答

恩知尤爲至幸伏懇

奏稿卷二十一

奎

天恩俯俞所請速敕閩浙廣東湖北兩江江蘇各督撫臣咨行閩
海粵海浙海江漢江海各關監督迅速遵辦實於陝甘大局裨益
非淺謹恭摺由驛馳奏伏乞

皇太后

皇上聖鑒訓示施行謹 奏

軍機大臣奉

旨另有旨欽此

江海關協甘月餉請照原撥續撥銀數按月全解月

同治六年三月十八日

再江海關協甘餉向係每月一萬兩嗣經戶部續撥銀三萬兩江海關仍祇照舊解濟并未遵照部撥之數上年十一月間臣請撥西征的餉欽奉

寄諭其江海關每月應濟甘餉并著曾國藩李鴻章郭柏蔭嚴飭

該監督按月解濟按季具奏欽此迄今江海關仍未遵解前署督

臣李鴻章亦并未奏明停解應請

敕下兩江督

臣江蘇撫

臣飭該監督照原撥續撥銀數按月全解

并即據實具奏

臣

此次不得已而籌借洋款洋商候信甚殷亟須

定局未及候江蘇覆奏已照江海關原撥續撥銀數指借銀每月

奏稿卷二十一

奏

三萬兩如江蘇一時不能遵撥關稅則江甯協甘月餉除劃歸浙

江每月解銀一萬兩外尚有應解甯夏將軍穆圖善軍餉銀一萬

兩陝甘督

臣

軍餉銀一萬兩共計二萬兩亦可按月撥交江海關

抵還欠款不慮缺少穆圖善見已奉

旨暫署陝甘總督

臣

未接督篆以前應解甘餉自當由

臣

分別撥

解必不膜視謹附片具奏伏乞

聖鑒施行謹 奏

軍機大臣奉

旨另有旨欽此

軍機大臣字寄同治六年三月二十五日奉

上諭左宗棠奏行抵德安擬俟淮霆各軍赴鄂再行入陝一摺見在鄂捻西竄而淮霆各軍尙未趕到左宗棠擬在德安稍停數日視賊所向再定進止洵能力顧大局不分畛域著該大臣探明如賊由舊口西竄卽行督軍會剿以收夾擊之效惟秦中捻回交訖勢甚猖獗而喬松年等布置未能裕如如淮霆各軍趕到左宗棠仍卽入關進駐西安妥爲調度左宗棠另摺奏擬援照成案於上海洋商借銀一百二十萬兩由各關稅項下撥還等語陝甘需餉孔殷各省協餉恐不能如期停兵待餉於剿賊機宜未免延緩自應照該大臣所請迅籌鉅款以期集事卽著曾國藩等督飭各海

奏稿卷二十一

三

關監督按照左宗棠所定數目出給印票發交道員胡光墉等向洋商支借兌付山西解州一面將匯票解赴該大臣營提用所借銀兩自本年七月起分六箇月於各關稅項下撥還仍飭各該省藩司將應解甘餉按月撥交各關以清款項其餘息銀等項均著照所議辦理原摺著鈔給曾國藩等閱看另片奏江海關協濟甘餉請仍照原撥續撥數目每月解銀三萬兩或該省未能遵撥卽於江甯應解甘餉內劃撥二萬兩各等語卽著曾國藩郭柏蔭遵照辦理其穆圖善月餉卽由左宗棠撥給原片并著鈔給曾國藩郭柏蔭閱看將此由六百里諭知曾國藩左宗棠英桂吳棠瑞麟譚廷襄曾國荃馬新貽蔣益澧郭柏蔭并傳諭周開錫知之欽此

軍機大臣字寄同治六年四月初九日奉

上諭昨據趙長齡奏陝西回捻各逆竄富平後欲以一股由同官繞北山渡黃入晉一股由富平蒲城趨韓城從龍門口入晉同州郃陽已見賊蹤等語晉省防務甚形喫緊趙長齡雖飭陳湜及蔣臨照等軍分路嚴防而該省兵力未盡足恃且沿河一帶地廣兵單守禦亦不敷分布若陝省無大枝勁旅痛加截擊勢將闌入晉疆貽誤全局左宗棠已由德安拔營著卽趲程前進星速入關飭令各軍認真截剿毋令一賊渡黃以保晉省完善之區是爲至要將此由六百里諭令知之欽此

隨州追賊出境剋期入關摺

同治六年四月十八日

奏爲隨州追賊出境行抵樊城雇備車馱剋期入關據實馳陳仰

祈

聖鑒事竊

臣

三月十八日德安行營具奏行期未能迅速拜發後

湖北撫

臣

曾國荃馳至德安會商長圍困賊之計維時捻逆全股

麇聚天門鍾祥濱漢各處正圖偷越漢西曾國荃檄水軍扼其西

與南陸軍扼其東永澧河阜市等處

臣

亦咨商劉典率所部由澠

口出扼新溝惟舊口東北之京山宋河必待淮軍分紮正北之洋

梓雙河必待鮑超之軍分紮然後長圍之勢可成賊趨舊口後日

夜環伺百計偷渡均爲補用提督左光培等師船擊卻曾國荃急

奏稿卷二十一

堯

請淮軍鮑軍速赴京山宋河梓雙河之約未幾淮軍統領四品

銜郎中李昭慶率所部馳赴德安擬俟各營到齊進駐宋河而鮑

超所部迄無進駐洋梓雙河之意賊旣爲師船所扼不能西渡懼

官軍長圍速合不得脫也則折竄京山徐覓去路

臣

於二十四日

令所部前軍進隨州二十五日率親兵各營繼之二十七日前軍

由隨州進駐州西北淨明鋪是日

臣

抵隨州途聞賊於二十五

日由洋梓竄入州西南之茅茨畝令偵卒覘之二十八日午後還

報賊由茅茨畝竄至環潭邊馬已到州城西之安居店二十九日

臣飭親兵各營伺賊厲山店擊之臨發隨州知州潘亮功言士民

倉卒聞警未盡入城僉懇

臣

軍緩發一日以順輿情

臣

亦念淨明

鋪諸軍文報忽隔厲山一帶必有賊梗賊由西而東厲山適居其中擊長蛇之腰防其首尾俱應且宜按兵俟之晡後都司丁太洋自東路探歸稱賊之大隊已至州東北三十餘里高城一帶其前隊到迤南十里萬家店在州城東四十里乃令各營募食進剿適得淨明鋪各軍報是日午後賊馬數百窺營當經擊退卽約令次晨亦由厲山東向擊之初一日黎明各營整隊疾進辰刻抵塔兒灣遇賊馬數百盤旋岡前忽見大軍倏至駭而奔須臾後股續由高城一帶紛至賊馬數千圍護賊眷輜重由山溝馳走以避槍礮甫自溝尾樹林穿出卽緊偃民寨土垣急行官軍恐轟傷人民開花劈山各礮不及施放而賊已度險矣馬隊從南路徑追至萬家

奏稿卷二十一

七

店北路各村賊館已空熱飯滿釜衣履滿地沿途拋棄豬牛甚多悉恣寨民收取聞東北山岡礮聲甚緊知淨明鋪追軍亦到也未申之間收隊還營是夜接淨明鋪各軍報知道賊情形與塔兒灣萬家店一路相同捻逆一見礮車卽絕叫快走略不回顧其馬力疲鈍奔駛不速者經洋槍叢擊人馬多斃或負創而逃約兩路共傷斃賊人馬僅百數十而賊已向信陽一路竄出矣初三日淮軍鳳營至隨州聞淮軍周盛波等亦至德安臣遂於初三日取道棗陽前進初八日抵樊城是役擊賊隨州機實可乘而斬獲獨少者緣臣創議獨輪車架劈山礮抵制賊馬而以新練馬隊當賊步隊

陣法新變未審能否如意而諸將狂於剃髮逆故技沾沾自喜恐

其輕遽債事故嚴飭其初次接仗必加意審慎勿縱擊窮追爲賊所算不料擒賊一見礮車卽狂奔不止官軍未能猛追多殺殊深慙憤也行抵樊城接劉松山黃鼎等稟報涇陽之捷知陝擒將東趨同朝臣原擬取道荆紫關入陝至是改議由潼關大路冀可迎頭截剿昨據劉松山等稟報小濠大濠之捷餘賊由西北竄逸似賊渡黃入晉之謀未息將由河津以北覓渡山西河防僅恃臬司陳湜一軍而南北千里道遠力分恐難兼顧臣已一面飛咨河南撫臣請速飭閔鄉防軍渡河而北接防河津以南替出陳湜水陸各營移防河津以北期臻周密臣行抵澠池陝州時偵察賊蹤如晉防周密卽取道潼關入同朝循河而北督同秦軍節節埽盪如擒回或竟已過河竄晉則全局關繫甚重臣擬卽率各軍由茅津渡河先清晉省賊氛然後入秦專剿回擒兵機因賊勢而生臣不敢以屢奉

諭旨坐鎮西安稍涉拘泥惟臣奉

命調督陝甘自三月至今因鄂擒狷獗淮軍鮑軍未到致愆師期又未能痛埽鄂氛以慰楚人之意茲復因逆氛逼晉全局攸關又預思改道援晉先晉後秦迹類逗畱迄無以慰秦人之意是則耿耿此衷有未能自釋者謹由驛馳陳伏乞

皇太后

皇上聖鑒訓示謹 奏

軍機大臣奉

旨另有旨欽此

奏稿卷二十一

三

洋商借款請 敕各省督撫速發印票片

同治六年四月十八日

再臣此次行糧僅止五萬餘兩入關後軍餉專恃洋商借款暫資接濟原議由山西解州運城匯兌取其距秦甚近足便取攜見聞運城商銀尙多可供匯兌惟盼望應協各省速發印票交上海轉運局畱閩道員胡光墉領取交洋商兌取見銀付與票商即可換取票商銀票至運城收兌臣軍有可指之餉自可迅赴戎機倘須由晉截餉就近提用尤爲便捷業經奏蒙

恩旨准行各省自當遵辦可否更請
敕催各督撫海關限令速發印票俾免稽延實於軍事大有裨益
謹附片具奏伏候

奏稿卷二十一

三

聖鑒訓示施行謹 奏

軍機大臣奉

旨另有旨欽此

軍機大臣字寄同治六年四月二十五日奉

上諭左宗棠奏隨州追賊出境行抵樊城雇備車馱剋期入關一摺鄂省軍情前據李鴻章曾國荃等各奏情形與左宗棠大略相同著李鴻章曾國荃懍遵疊次諭旨廣籌方略迅殄逆氛昨據曾國荃奏陳鮑超病狀甚爲廛系該提督患病以來所部各軍暫派宋國永統帶疊經有旨催令夾擊何以至今未聞宋國永等與賊接仗若早能移軍駐扼洋梓雙河何至縱賊亂竄著李鴻章曾國荃傳諭鮑超速令宋國永等扼紮要隘聽候調度奮力剿賊如再貽誤必將宋國永等從重治罪鮑超亦不能辭咎也前據庫克吉泰等奏劉松山等軍節次獲勝賊勢已窮當諭該將軍等督飭各軍乘勝殄除并防竄晉左宗棠節制晉省呼應始靈著隨時偵察賊蹤會同趙長齡等加意防範相機掃盪所陳取道情形朝廷不爲遙制另片奏請敕催各海關速發印票等語已諭令曾國藩等迅速籌辦矣將此由六百里諭知李鴻章左宗棠曾國荃趙長齡并傳諭鮑超知之欽此

晉防緊要請調吉林礮手由綏遠城入晉助剿片

同治六年四月十八日

再臣前奉

諭旨兼節制山西防軍山西撫臣趙長齡曾函商晉防已責成臬

司陳湜辦理防務可恃若別歸節制恐軍情不無觀望屬臣無庸

調度而陳湜書來亦言聞有明降

諭旨撫臣久未行知臣不測撫臣意之所在但答云

聖意塵念河防原期兼顧不敢推諉併歸節制斷不紛紜調遣總

之於晉無損也茲正拜摺間復欽奉四月初九日

寄諭晉省防務甚形喫緊趙長齡雖飭陳湜及蔣臨照等軍分路

嚴防而該省兵力未盡足恃且沿河一帶地廣兵單守禦亦不敷

奏稿卷二十一

壹

分布若陝省無大枝勁旅痛加截剿勢將闌入晉疆貽誤全局左

宗棠已由德安拔營著即趨程前進星速入關飭令各軍認真截

剿毋令一賊渡黃以保晉省完善之區欽此臣查晉省防務僅陳

湜一軍分布河津以南抵渭水入河之處止自龍門以北近千里

津渡甚多撫臣除咨委總兵蔣臨照分防外祇委道員恆祐赴保

德興臨一帶汪溥赴永甯及隰屬一帶催辦民團誠如

聖諭地廣兵單守禦亦不敷分布興思及此實可寒心見在賊已

由韓城郃陽北趨臣軍入關在賊之後不但勢不相及而晉省北

路河防未固即能痛剿亦祇速其東趨於事無益除飭秦軍劉松

山黃鼎相機繞出賊前遏其北竄飭陳湜俟豫軍渡河接防後即

移軍向河津以北節節嚴防爲暫顧目前之計因思臣前奏調吉林礮手二千五百名開練馬隊赴秦剿賊此時如已齊備似可卽由綏遠城取道入晉助晉防剿屆時若晉省河防尙未被賊闌入則由和林格爾托克托城清水河入邊牆抵河曲縣循黃河東岸南下亦可壯晉省西北一路聲威將來晉防葺事由蒲州西渡入秦道路亦不紆折惟所經無驛地方須由晉省遴派員弁攜帶銀兩籌辦糧食秣料俾得進行伏乞

敕下山西撫臣屆時妥爲照料勿稍推諉又此項礮手需遴員分統官階不必尊崇紀律必需嚴肅伏懇

聖明簡派曾經戰陣明練耐苦兩員分統西行庶便節制是否如

奏稿卷二十一

三

斯合併陳明伏乞

聖鑒訓示謹 奏

軍機大臣奉

旨另有旨欽此

軍機大臣字寄同治六年四月二十五日奉

上諭左宗棠奏晉省防務喫緊并請將前調吉林礮手卽行取道入晉等語前因左宗棠奏調吉林礮手交協領喜昌管帶赴陝當經諭知富明阿等照料嗣據該將軍等覆陳挑募不易已敕不必拘定二千五百名以昭慎重其確數尙未奏報見據左宗棠奏催此項礮手馬隊勢難再緩著富明阿富爾琿德英將礮手趕緊挑齊喜昌尙未回吉著該將軍等先於曾經戰陣明練耐苦力能約束者慎選兩員分起管帶入晉左宗棠片內所稱礮手可由綏遠城取道入晉助晉防剿若賊未入晉卽敕知由和林格爾托克托城等處入邊牆抵河曲縣循黃河東岸南下等語此項礮手若盡由邊外行走支應甚難自應仍由山海關先抵直隸屆時察看山右軍情再定所向非但支應較易道途亦爲便捷將來如入晉境著趙長齡飭沿途妥速豫備俾利遄行以備左宗棠訓練驅策喜昌到吉後卽迅飭前往毋再延緩捻回來往同朝晉省岌岌堪虞所有山西軍務仍歸左宗棠節制以一事權趙長齡務須和衷會籌不可先存意見陳湜有防守黃河之責尤宜激勵所部實力嚴防毋得貽誤將此由六百里諭知左宗棠富明阿富爾琿德英趙長齡并傳諭陳湜知之欽此

鮑超傷病情形片

同治六年
關月日

再此次賊竄舊口官軍原可速合長圍困之曾國荃函催鮑超奚止十有餘次鮑超總以傷病難支辭謝最後僅令宋國永等由樊城出紮四十里之八條岡聊以塞責而曾國荃指紮之洋梓雙河迄無一兵駐紮前月二十五日賊果由洋梓竄逸竊思鮑超以一兵丁累功擢至實缺提督

錫封一等子爵

恩寵備至無以復加應如何激發天良勉圖報稱乃竟以傷疾爲由甘心失機擁兵不發屢蒙

溫旨慰勉并無愧奮圖功之念似此驕橫實近今武臣所僅見夫

奏稿卷二十一

美

鮑超所藉以爲詞者病不能戰耳其所自矜自惜者以從前臨陣過勇受傷太重耳不知軍興十餘載將士皆以鋒鏑餘生致身運顯如鮑超之創痕徧體者何可勝數卽鮑超所部將領臣所素知者亦實不乏其人古云擐甲執兵固卽死也身爲大將何可以此驕人且鮑超所部馬步三十三營統領八員皆已保至提鎮鮑超所患雖重不能卽戎亦應分遣各統將代已力戰以赴戎機豈可臣以一身之病束縛諸軍置時局於不顧臣前曾函告鮑超言其不可并於該軍統將函牘中詳爲開示矣昨初八日行抵樊城接見該軍將領宋國永等復以大義爲之陳說初九日臣往視鮑超病見其面色黧黑肢體厥冷病狀屬實心頗憐之然念其此次貽誤

則愚衷實有難以釋然者詰責之間不覺聲色俱厲宋國永等見已於十一日分統所部赴德安鮑超亦於十三日坐船赴武昌養病連接曾國荃函告捻逆又由信陽界折竄應山縱橫於漢黃各屬意圖由此竄皖淮軍統將本多皖人自當截其入皖宋國永等分統鮑超所部馬步全軍由德安前進躡蹤追擊冀可爲湘軍之助與淮軍共收夾擊之功此賊若能於鄂境殲除則中原除一巨患鄂雖苦遭蹂躪而各省之保全者多矣可否請

旨敕下李鴻章曾國荃傳諭鮑超宣示

朝廷優容德意責其嚴飭所部奮勉圖功以道咎責庶武臣之驕蹇不用命者有所憚而不敢任意妄行而

奏稿卷二十一

堯

朝廷馭將之道亦得矣至鮑超一軍所以能強者以所部文員多所弛之士武職多粗厲猛起之才勇丁多桀驁不馴之輩不可一一問其由來惟鮑超能以不測之威馭之故有時得其死力然將來事平遣撤恐其中如叛勇黃矮子歐陽暉者不少矣臣於前年疏辭鮑超之歸臣節制并議減其人足其餉者以此然彼時但嫌其拙而未料其驕一至於此也其所以驕至於此者以同時軍務咸推其勇決賊亦實憚其威名故主兵之人每遇賊悍事急輒爭欲致之以爲重耳其所以如此者蓋謂此軍本有戰功也其所以獨擅戰功者以賊強不輕戰兵少不肯戰其戰也又必以全軍併之一路雖所統至數千盈萬之多亦不肯分支故其軍馳驅往來

之日多而接仗之日少其獲勝在各軍聚集之日多而獨當大股悍賊之日少也鮑超好自矜戰功報仗多誇張之詞有出人意外者主兵之人欲招致之非美其詞不可諛之而猶不應必且於章奏中逾分以優揚之於是鮑超之勇聞於天下而鮑超亦居之不疑氣矜亦日甚矣臣識鮑超最早鮑超感臣頗深而其待臣亦恭而有禮臣所以直揭其短者竊謂鮑超原可用之將能令斂其驕橫之氣稍明義理猶可仰副

朝廷愛惜將才之盛德而鮑超亦得以功名終幸而鄂忠早平此軍似宜畱於餉源稍裕省分分起妥爲安插庶免異患愚昧之見是否有當謹附片陳明伏乞

奏稿卷二十一

全

皇太后

皇上聖鑒訓示謹 奏

軍機大臣奉

旨畱欽此

